



## SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka («Službeni glasnik BiH» broj 95/12 i 41/16), člana 25. Pravilnika o godišnjim finansijskim izvještajima političkih stranaka («Službeni glasnik BiH» broj 96/13 i 89/16) i člana 12. Pravilnika o administrativnim procedurama pregleda, kontrole i revizije finansijskih izvještaja političkih stranaka («Službeni glasnik BiH» broj 103/08), izdajem

### IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2015. GODINU **HRVATSKI NARODNI SAVEZ BIH**

Broj: 03-07-6-572/16  
Sarajevo, 05.07.2017. godine

## SADRŽAJ

MIŠLJENJE REVIZORA.....	3
1. UVOD.....	4
2. PREDSTAVLJANJE POLITIČKE STRANKE.....	4
3. OPIS PREGLEDA I KONTROLE FINANSIJSKOG IZVJEŠTAJA.....	5
Predmet pregleda i kontrole.....	5
Cilj pregleda i kontrole.....	5
Obim pregleda i kontrole.....	5
4. PRETHODNE KONTROLE I REVIZIJE.....	5
5. NALAZI I PREPORUKE.....	5
5.1. NALAZI.....	5
5.2. PREPORUKE.....	6

## **MIŠLJENJE REVIZORA**

Služba za reviziju finansiranja političkih stranaka izvršila je pregled godišnjeg finansijskog izvještaja Hrvatskog narodnog saveza BiH za 2015. godinu.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka, te uspostavljanje efikasnog sistema internih kontrola.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskih izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

**Pregledom godišnjeg finansijskog izvještaja za 2015. godinu, utvrđeno je da je Hrvatski narodni savez BiH prekršio odredbe člana 11. i člana 12. Zakona o finansiranju političkih stranaka.**

**Na osnovu našeg pregleda, odnosno kontrole finansijskog izvještaja, osim gornje napomene, nismo zapazili ništa značajno što bi ukazalo na nedostatke u finansijskom izvještaju ili na finansiranje ove političke stranke suprotno odredbama Zakona o finansiranju političkih stranaka.**

## 1. UVOD

Služba za reviziju finansiranja političkih stranaka (u daljem tekstu: Služba za reviziju) je izvršila pregled godišnjeg finansijskog izvještaja Hrvatskog narodnog saveza BiH za 2015. godinu.

Pregled i kontrola finansijskog izvještaja su provedeni u skladu sa članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja, Hrvatski narodni savez BiH se finansirao iz sljedećih izvora:

R/B	Izvori finansiranja	Iznos (KM)	Struktura (%)
1.	Članarina	0,00	0,00
2.	Prilozi fizičkih lica ( 3-a )	0,00	0,00
3.	Prilozi pravnih lica ( 3-b )	0,00	0,00
4.	Prihodi od imovine ( 3-c )	0,00	0,00
5.	Prihodi od dobiti preduzeća u vlasništvu političke stranke ( 3-d )	0,00	0,00
6.	Prihodi od poklona ( 3-e )	0,00	0,00
7.	Prihodi iz budžeta ( 3-f )	39.893,81	100,00
8.	Prihodi od propagande ( 3-g )	0,00	0,00
9.	Ostali prihodi	0,00	0,00
<b>I</b>	<b>Ukupni prihodi (1-9)<sup>1</sup></b>	<b>39.893,81</b>	<b>100,00</b>
<b>II</b>	<b>Kreditno zaduženje kod banaka</b>	<b>0,00</b>	<b>0,00</b>
	<b>Izvori finansiranja (I+II)</b>	<b>39.893,81</b>	<b>100,00</b>

U godišnjem finansijskom izvještaju za 2015. godinu Hrvatski narodni savez BiH iskazao je rashode u iznosu od 34.088,52 KM.

## 2. PREDSTAVLJANJE POLITIČKE STRANKE

Naziv političke stranke je Hrvatski narodni savez BiH. Skraćeni naziv stranke je HNS BiH.

Politička stranka HSS-NHI je Rješenjem, broj: 065-0-Reg-08-001502 od 16.05.2008. godine upisana u registar kod Općinskog suda u Sarajevu, kao pravni sljednik Hrvatske seljačke stranke BiH i Nove hrvatske inicijative. Rješenjem Općinskog suda u Sarajevu, broj: 065-0-F1-14-000001 od 17.04.2014. godine, upisana je promjena naziva stranke i promjena sjedišta. Naziv stranke je Hrvatski narodni savez BiH.

Sjedište stranke je u Sarajevu, u ulici Husrefa Redžića broj 10/8.

Lica ovlaštena za zastupanje stranke za 2015. godinu su: Drago Džambas, predsjednik, Tomislav Tomljanović, dopredsjednik i Krešimir Zubak, predsjednik Glavnog odbora stranke.

Lice ovlašteno za podnošenje finansijskih izvještaja za 2015. godinu je Branimira Almaš.

<sup>1</sup> Podaci iz korigovanog finansijskog izvještaja za 2015. godinu, koji je dostavljen dana 05.06.2017. godine.

Prema podacima iz godišnjeg finansijskog izvještaja za 2015. godinu, organizacionu strukturu Hrvatskog narodnog saveza BiH čine:

- Središnji ured HNS Sarajevo,
- šest (6) kantonalnih organizacija,
- dvije (2) regionalne organizacije i
- 27 općinskih organizacija.

### **3. OPIS PREGLEDA I KONTROLE FINANSIJSKOG IZVJEŠTAJA**

**Predmet pregleda i kontrole** je godišnji finansijski izvještaj Hrvatskog narodnog saveza BiH za 2015. godinu.

**Cilj pregleda i kontrole** je da revizor na bazi finansijskog izvještaja pokuša da ustanovi da li je politička stranka u izvještajnom periodu postupala u skladu sa odredbama Zakona o finansiranju političkih stranaka. Ukoliko revizor na bazi kontrole finansijskog izvještaja utvrdi određena kršenja navedenog zakona, ocjenjuje da li je potrebno izvršiti terensku reviziju da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka.

**Obim pregleda i kontrole** finansijskog izvještaja Hrvatskog narodnog saveza BiH obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava. Obim pregleda i kontrole je bio ograničen, obzirom da politička stranka nije dostavila kompletnu finansijsku dokumentaciju i poslovne knjige.

### **4. PRETHODNE KONTROLE I REVIZIJE**

Služba za reviziju je zaključno sa finansijskim izvještajima za 2007. godinu obavila pregled i reviziju pojedinačnih finansijskih izvještaja političkih stranaka Hrvatske seljačke stranke BiH i Nove Hrvatske inicijative, koje su se tokom 2008. godine ujedinile u političku stranku HSS-NHI.

U periodu od 2008. do 2014. godine Služba za reviziju je obavila reviziju i pregled finansijskih izvještaja HSS-NHI, nakon čega su izdati izvještaj o reviziji, odnosno izvještaji o pregledu sa mišljenjem revizora, nalazima revizije i preporukama.

Nakon obavljene revizije za 2014. godinu, izdat je izvještaj sa nalazima revizije i preporukama stranci da finansijska sredstva koristi isključivo za ostvarivanje ciljeva utvrđenih u programu i statutu stranke, da finansijske izvještaje koje podnosi Centralnoj izbornoj komisiji Bosne i Hercegovine popunjava u skladu sa Pravilnikom o godišnjim finansijskim izvještajima političkih stranaka i da finansijske izvještaje podnosi u rokovima propisanim Zakonom o finansiranju političkih stranaka.

#### **Nerealizovane preporuke:**

Na osnovu uočenih nedostataka u godišnjem finansijskom izvještaju za 2015. godinu, utvrđeno je da Hrvatski narodni savez BiH nije ispoštovao preporuke revizije.

### **5. NALAZI I PREPORUKE**

#### **5. 1. NALAZI**

**Hrvatski narodni savez BiH prekršio je odredbe člana 11. i člana 12. stav (1) i stav (3) Zakona o finansiranju političkih stranaka.**

Na osnovu obavljenog pregleda godišnjeg finansijskog izvještaja i dodatne dokumentacije, utvrđeno je da Hrvatski narodni savez BiH nije pravilno vodio evidencije o prihodima i rashodima, godišnji finansijski izvještaj nije podnio u zakonom predviđenom roku i isti nije popunio u skladu sa odredbama Pravilnika o

godišnjim finansijskim izvještajima političkih stranaka-u daljnjem tekstu: Pravilnik, čime su prekršene odredbe člana 11. i člana 12. stav (1) i stav (3)<sup>2</sup> Zakona o finansiranju političkih stranaka.

Stranka je dostavila Završni račun za 2015. godinu (Bilans stanja i uspjeha) koji nije potpisan i ovjeren pečatom stranke, te nije ovjeren pečatom nadležne institucije (AFIP), što ukazuje da stranka nije podnijela Završni račun za 2015. godinu u skladu sa računovodstvenim propisima.

- Uvidom u službene evidencije, utvrđeno je da je Hrvatski narodni savez BiH godišnji finansijski izvještaj za 2015. godinu dostavio dana 16.05.2016. godine, tj. nakon zakonom propisanog roka.
- Kontrolom prometa izvoda sa transakcionog računa Kantonalnog odbora HNS BiH Hercegbosanski<sup>3</sup>, utvrđeno je da su tokom 2015. godine sa ovog računa isplaćena sredstva za materijalne troškove u iznosu od 4.967,07 KM.

Pregledom godišnjeg finansijskog izvještaja utvrđeno je da stranka nije dostavila obrazac 4-1 (režijsko-administrativni i ostali troškovi) za Kantonalni odbor HNS BiH Hercegbosanski koji je Odlukom br. 01-102/15 od 21.12.2015. godine raspušten, što ukazuje na činjenicu da su i ukupni rashodi u godišnjem finansijskom izvještaju iskazani u manjem iznosu od ostvarenih, čime su prekršene odredbe člana 21. i 22. Pravilnika.<sup>4</sup>

Stranka u godišnjem finansijskom izvještaju nije iskazala ni promet ostvaren putem blagajne, čime je prekršila odredbe člana 12. Pravilnika.

## 5.2 PREPORUKE

*Preporučuje se Hrvatskom narodnom savezu BiH da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:*

- *da poslovne knjige vodi u skladu sa računovodstvenim propisima, odnosno da vodi potpune evidencije o prihodima i rashodima i*
- *da finansijski izvještaj podnosi u roku propisanom Zakonom o finansiranju političkih stranaka i popunjava u skladu sa odredbama Pravilnika o godišnjim finansijskim izvještajima političkih stranaka.*

## KOMENTAR:

Stranka je dostavila primjedbe na Preliminarni izvještaj o pregledu zajedno sa korigovanim finansijskim izvještajem za 2015. godine. U dostavljenom finansijskom izvještaju stranka je izvršila korekcije na obrascu 3. (izvori finansiranja), prilogu uz obrazac 3, obrascu 3-c (prihod od imovine) i na obrascu 5 (obaveze stranke), čime je djelimično otklonila nedostatke u popunjavanju finansijskog izvještaja, što je Služba za reviziju uvažila i korigovala nalaze revizije u konačnom izvještaju o pregledu godišnjeg finansijskog izvještaja.

Šef Odsjeka za revizijske poslove

Šef Službe za reviziju

<sup>2</sup> U skladu sa odredbom člana 12. stav (3) Zakona o finansiranju političkih stranaka („Službeni glasnik BiH“ broj: 95/12), stranka je obavezna podnositi finansijski izvještaj do 31. marta naredne godine, u formi koju odobri Centralna izborna komisija Bosne i Hercegovine.

<sup>3</sup> Transakcioni račun broj: 1549212000753617 kod Intesa Sanpaolo banke –Filijala Mostar Poslovnica Tomislavgrad, ugašen je 31.12.2015. godine.

<sup>4</sup> Hrvatski narodni savez BiH je dostavio samo obrazac 4-1 za Središnji ured stranke.

Sanja Tošović

Revizor

Nevenko Andan

Mr. sc. Hasida Gušić